

АССАЛАМУ АЛЕЙКУМ!

РАЙОННУ ЯШАВУ



БУДНИ РАЙОНА

◆ Къарабудагъгент районну жумалыкъ жамият-сиясат газети.

◆ Газета выходит на кумыкском и русском языках.

◆ Карабудахкентская районная еженедельная общественно-политическая газета.

◆ № 4 (6692) Жумагон, 27 январ (аювъятгъан) 2023-нчю йыл ◆ Пятница, 27 январь, 2023 год. ◆ Газета издаётся с ноября 1951 года

Республикада

С.Меликовну «тувра берилиши»



Насрулла БАЙБОЛАТОВ

Арбагон, январ айны 25-нде, Дагъыстанны Башчысы Сергей Меликов алдагы йылланы мердешин узатып, тувра эфирде оьзюне берилген соравагъа жаваплар къайтарды.

Ачыкълашдырып айтгъанда, бизин республикада иш гёреген телерадиокомпанияланы имканлыклары булан пайдаланып, уч сагъатны узагында ватандашлар булан къатнап турду. Шо гъакъда айта туруп, Интернетден таба берилишге бир вакътини ичинде гъар тюрлю жамият торлагъа къуршалгъанлар да къарамагъа болгъанын айрыча эсгермеге тюше. Демек, маълумат къуралларда эки жума алда шо берилиш болажагы гъакъда билдирилген сонг, ватандашлар йиберген 4 минг 500 соравадан 35-сине толу ва тындырыкълы жаваплар берилди.

Оьтгерилген шо берилишни барышында ол алгъасавлу гъалда яшавгъа чыгъармагъа тюшеген политика агъамияты булангы, олай да оьр гъакимлик къуллукъларда гёз алгъа тутулгъан алмашынывланы гъакъында маълумат берди. Бизин республиканы экономикасыны, яшавлукъ-коммунал хозяйство-суну, янгыз шагъарларда туюл, юртларда да адамлагъа артыкъ онгайлыкълар болдурувгъа байлавлу не къадар гъаракат юрюлмеге тюшегенине байлавлу оьзюню янашывун малим этди.

Дагъыстанны Башчысы юрт хозяйство тармакъда яшавгъа чыгъарылагъан милли проектлени ва программаланы гъакъында айтды. Инг алда ол бугюндерде бизин республиканы авлакъларында оьсдюрюлген тюшюмню, олай да гъайванчылык тармакъда болдурулагъан сурсат ва ашамлык малланы ишлетивге тергев берилегенин ташдырды. Ону сёзлерине гёре, гъар тюрлю емишлени ишлетив булан машгъл болгъан предприятиялени къурулушу ва шоланы ишге салыв бугюнлерде уьстюнлю кюйде юрюлегенин айтмагъа бажарыла. Шолай, Кукини юртагъы емишлени ишлетеген заводну ярашдырып, янгыртывгъа байлавлу масъала ювукъ вакътини ичинде мекенли кюйде чечилежек. Къызлар районда этни ишлетеген предприятия къурулушу башланажакъ. Шондан къайры да, Дагъыстанны къыбла районларында инвестиция проектни яшавгъа чыгъарыв гъаракатны оьлчевюнде ашамлык ва сурсат малланы ишлетивге ва оланы сакълав булан машгъл болажакъ айры уллу комплекс къурулажакъ.

Бугюнлерде "Дондагы Ростов – Бакю" ёлну боюнда юрт хозяйство малланы сатып алывгъа байлавлу уллу центрланы къурувну имканлыклары да ахтарыла. Шолай центрлар къурулса, уллу тюкенлени есилерине арачылар къошулмай-



гъан кюйде фермерлер болдурагъан ашамлык малланы сакъламагъа ва шоланы сатывгъа чыгъармагъа къошум имканлыкълар болдурулажакъ.

Юрюлген берилишни вакътисинде Дагъыстанны Башчысы Сергей Меликов Украинада бугюнлерде юрюлеген хас асгер гъаракатда оьлгенлени агълюлерине гъакимлик къурумларыны янындан этилеген кёмекни гъакъында да билдирди. Оланы эсделегин даимлешдирмек учун Каспий флотилия, олай да Буйнакс-киде 136-нчы асгер бригада токътагъан ерлени ювугъунда бизин улкени ва республиканы гележеги учун олар гёрсетген къочакълыкны эсге салагъан эсделеклер къурулажакъ.

Бу йылны ичинде Буйнакс

шагъарны ичеген сув булан толу кюйде таъмин этмек учун быргылар тартылып битежек. Дербент шагъарны халкъын ичеген сув булан таъмин этивню яхшылашдырмакъ муратда сув йиберилеген быргыларыны къурашдырыв да юрюле. Сув йиберилеген быргыларыны къурашдырывгъа байлавлу «Чиркей – Махачкала – Каспийск» деген проект де яшавгъа чыгъарыла. Шо проект толу кюйде кютюлген сонг, Октябр инкъылапны атындагы каналдан уллу шагъарларда яшайгъанлагъа ичмек учун сув йиберилмежек.

Шондан къайры да, 2023-нчю йылда Магъачкъала шагъарда жамият агъамияты булангы 142 ерни ва кёп къабатлы уйлени абзарла-

рында бир тюрлю онгайлыкълар болдурулажакъ, ял алывгъа шартлар яратылажакъ. Шолай ишлени бизин республиканы оьзге шагъарларында ва юртларында да кютмеге гёз алгъа тутула. Шону булан бирге, гъар юртада физкультура ва спортну гъар тюрлю журналлары булан машгъл болмакъ учун шартлар яратылмагъа гёз алгъа тутулгъанын да эсгерди.

Республиканы башчысы Сергей Меликов булангы тувра берилишде Къарабудагъгент юртдан кёп яшлы ана Белла Гъамзаева оьзюгер догазификация программа булан оьзюню уьюне газ тартма кёмек этмеге байлавлу сорава берген.

Сергей Меликов кёп яшлы анагъа кёмек этме тарыгъын айтды.

Къарабудагъгент юртну ватандашы догазификация программа булан газ тартма тарыкълы документлерин бергени сегиз айдан къолай бола. Тек, о къатынны айтывуна гёре, натижа ёкъ.

Сергей Меликов республиканы Минэnergосуну ёлбашчысына ва «Къарабудагъгент район» муниципал районну башчысына тувулунгъан масъаланы чечме тапшурув берди.

– Программа бу йыл да ва гелеген йыл да ишлежек. Бизин республиканы ватандашларыны эсине саламан, программада ортакъчылык этмеге топуракъ гесеклени, яшавлукъ уйлени тарыкълы документлери болма тарыкъ, шо заман догазификация программаны имканлыкъларындан пайдаланма бола, деди республиканы башчысы.

Дагъыстанны Башчысы Сергей Меликов айтгъан кюйде, тувра эфирни имканлыкълары булан пайдаланыв ватандашлар булан къатнаву, оланы къыйынын-тынчын билмек учун асувлу ёл болуп токътай. Гъакимликни ерли къурумларыны башалманчылыгын алдын алмакъ муратда гележекде де шо ёрукдагы берилишлер чакъда-чакъда оьтгерилежек. Шону булан бирге, ол тувра эфирни вакътисинде ватандашлар берген соравада гётерилеген масъаланы чечивге байлавлу тийишли гъакимлик къурумланы вакиллерине тапшурувлар да берди.

